

پومیات عائلة مفروسة

ديوان شعر غنائی

أحمد إبراهيم خليل

دار قصص وحكايات للنشر الإلكتروني 2019

يوميات عائلة مفروسة

ديوان شعر غنائى

أحمد إبراهيم خليل

العنوان: يوميات عائلة مفروسة

النوع الأدبي: ديوان شعر غنائي

المؤلف: أحمد إبراهيم خليل

المُدقق اللُّغوي: الماتب بنفسه

اللغة: فصحي

التنسيق الداخلي والإخراج الفني: فريق عمل الدار

تصميم الغلاف: فريق عمل الدار

سنة النشر: 2019

الحالة: حصريًا

رقم الطبعة: 1

رقم الكتاب بالدار: 35

تم النشر بواسطة دار قصص وحكايات للنشر الإلكتروني 2019

الدار غير مسؤولة عن أفكار الكُتاب الواردة بإبداعاتهم؛ الكُتاب وحدهم المسؤولون عنها.

الصفحة الجروب الموقع

الفهرست

- ٦..... يوميات زوج مفروس
- ٨..... يوميات زوجة مفروسة
- ١٠..... يوميات طفل مفروس
- ١٢..... آه يا دنيا
- ١٥..... مبكرهكيش
- ١٧..... يا أمى
- ٢٠..... إسترجل
- ٢٣..... إبدأ بنفسك
- ٢٥..... إعمل خير
- ٢٨..... بتعذبي نفسك ليه
- ٣٠..... يا مدرستنا
- ٣٢..... هتقومى يا مصر
- ٣٤..... مفيش بركة

- ٣٧جانا رمضان
- ٤٠راجع بعد الأوان
- ٤٣صلى على الرسول
- ٤٦موعد مع الموت
- ٥٠كفائه ذنوب
- ٥٢نبذة عن الشاعر

يوميات زوج مفروس

إتجوزت يا ناس بعد ما حببت

أتارى الجواز خراب للبيت

كنت فاكر هعيش حياتى

دلوقتى عايش بقول ياريت

**

الله يرحم سهر الليالى

والقلب اللى كان عايش عشانى

والحب اللى كان حلم فى خيالى

دلوقتى بقول آه يانى

**

كنت شايف رقه ماشفتهاش

دلوقتي شايف وللا أحسن بلاش

كنت عليها دايمًا بخاف

دلوقتي نفسي أجيب رشاش

**

ياما كتير قبلي ونصحوني

العقل زينة بلاش عاتبوني

قلت حياتي أنا حر فيها

دلوقتي بقول آه يا عيوني

يوميات زوجة مفروسة

من يوم ما بقيت عروسة

عايشة حياتى مفروسة

وبتعايرنى بنانسى كمان

وأنا ليل نهار مهووسة

**

جيت فى مرة تدلعنى

أو حتى أشكى وتسمعنى

لى غيرك مين يعنى

وانت القلب اللى يسعنى

**

طول الوقت أنا شغالة

وأنت عايش ولا همك

رايحة جاية عماله

أراضيك وراضى أمك

**

أنت نايم نهار وليل

وأنا شايفة ياعينى الويل

شغل وعيال وبيت

ولا مرة عنى بتشيل

يوميات طفل مفروس

أرجوك يا بابا اسمع منى

وكفاية ليه بس تهنى

لو غلطت يا بابا علمنى

واقعد معايا ليه تسيبنى

**

وانتى يا ماما على مهلك

إيدك سابقه ليه عقلك

لا أنا فى سنك ولا أدك

ابنك يا ماما ومحتاجلك

**

الكل ليه جاي علىّ

وأنا طفل برئ صافى النية

التربيه دى علم ودراسة

مش ضرب لحد الصباحية

**

كل شئ يا عيب يا حرام

مش مسموح أى كلام

مش مسموح حتى أفكار

ويتحاسبونى على الأحلام

آه يا دنيا

الكل بيجرى ويتسابق

ع الدنيا الكل بيتخانق

واقفين لبعض على الواحده

يا خساره قلوبنا بقت جاحده

**

الكل بيجرى على الفاضى

مفيش يا دنيا واحد راضى

إلى بيقدر مبيعفيش

ودا دلوقتى بقى العادى

**

الكل طمعان ومفيش

والحِجْه إيه أكل العيش

ياريت فى لقمة مكفية

أو عارفين ياناس حتى نعيش

**

الكل بيجرى على المال

من أى سكه شغال

عشان بعدنا عن الله

وصلنا خلاص لأصعب حال

**

الكره مالى قلوب الناس

الكل نفسى وبس خلاص

وما دام بعدنا عن الدين

مفیش بشر ولا إحساس

**

عایشین بنجرى على هوانا

والآخرة مش فارقه معانا

دا العمر ببعدى ثوانى

كثر الذنوب آه عميانا

مبكرهكيش

حببتك حب كبير مقدرتيش

اخترت يا روحى معاكى بس أعيش

**

كنتى الماضى وحلم الحاضر

كل كلامك أقولك حاضر

كنت عشانك دايمًا أخاطر

بس إنتى حبيبتى مفهمتيش

**

كنت بحبك حب جنون

كان الصعب معاكى يهون

كنتى عندى بكل الكون

بس إنتى حبيبتى محستنيش

**

عمرى فى حبى ما كنت ضعيف

كنت معاكى نسمة فى صيف

وأنا وياكى ربيعى خريف

بس إنتى خلاص متعلمتيش

**

كنت معاكى لازم هتغير

كبرت خلاص مبقتش صغير

شايف حالك كله يحير

بس أنا يا حبيبتى مبكرهكيش

يا أمى

لو بعيدة قريبة

يا أمى يا طيبة

عايشة جوه قلبى

يا حبيبتى يا حنينه

**

لو قلت آه بتعانى

تسهرى جنبى ليالى

وبتتمنى يا أمى

تتعبنى إنتى مكانى

**

دايما شايلة همى

يا أقرب ليا منى

وناسية يا أمى نفسك

ولا عمرك غبتي عنى

**

عطائك مالوش نهاية

حبك أجمل حكاية

لو إديت ليكى عمرى

يا أمى مش كفاية

مقدرش أستغنى عنك

وكفاية دعوة منك

إطلبى يا أمى منى

تلاقينى تحت أمرك

كل ليل وله نهاره

كل حب وله عذابه

إلا حبك يا أمي

دائما زايد عطاؤه

إسترجل

بلاش شرب السجاير

والشيشة والحشيش

هتشكى من الخسائر

والصحة كمان مفيش

**

بلاش أكل الشوارع

ومعاكسة البنات

متعملش فيها صايع

وانت ليك إخوات

**

خليك دايمًا راجل

وأد كلمتك

اقف في وش الباطل

متبعش ذمتك

**

مش معنى إن إنت فاضى

تجيب في سيرة الناس

لو كنت شايفها عادى

هتشرب نفس الكأس

**

احترم الأكبر منك

مش مهم هو مين

هو يعنى الأصغر منك

بيتعلم منين

**

لو مرة واحد آمنك

إياك في مره تخونهُ

كفاية إنْ ضمّنك

حافظ عليه وصونهُ

إبدأ بنفسك

إبدأ بنفسك صحى ضميرك

خليك المثل متبصش لغيرك

إيد إنت شمعته متلعنش الظلام

إتعب ودور حدد مصيرك

**

إنهض وقوم شمر إيديك

بُكره الدنيا تشاور عليك

لو كنت كبير أو حتى صغير

هنبنى بلدنا إيدى فى إيديك

**

مادام إنت عايش مفيش مستحيل

إخترنا الكرامة والموت البديل

مش هنقبل لواحد فينا ذليل

عشانك يا مصر هنرد الجميل

**

إمشى طريقك متبصش وراك

مادام إنت صح مش فارقه معاك

لو صعب الطريق وإنت وحيد

ريك كبير هيحفظ خطاك

إعمل خير

إعمل خير وإرميه فى البحر

وإوعى تسب فى يوم الدهر

مهما الدنيا كانت وياك

إتحمل يوم وإتحمل شهر

**

إعمل خير متقولش الناس

إنت بتبنى بجد أساس

إعمل خير متقولش ظروف

وإوعى تكون من الخير مكسوف

**

مهما كبرت ومهما عليت

مهـما يكـون محتـاج البـيت

إـعمل خـير ومـتستـناش

وإـوعى تـقول الخـير ببـلاش

**

مهـما تشـوف من الخـير دا مرار

إـعمل خـير لو قابـلك نار

عـيش فـى الدنـيا إـصبر وإـتحـمل

هـى الجـنة دخـولها هـزار

**

إـعمل خـير دا الخـير لله

وإـمشى عـلى خـطى الحـبيب

محتـاج إـيه بعـد رضاه

ولنبي الرحمة قريب

بتعذبي نفسك ليه

بتعذبي نفسك ليه

هوّ يستاهل إيه

لسه بتفكرى فيه

وقلبك بيكى عليه

**

إيه يعنى إنسان حبتيه

باع الحب وباعك

من بعد ما حسيتى بيه

منهاره دا إختيارك

**

لو كان حبك حقيقى

مكتشى دى النهايه

ولا إنتى أول ضحيه

ولا هوه الحياه

**

من حقاك تفرحى

مادام باعك بعيه

على إيه تتعذبى

على خاين حبتيه

يا مدرستنا

يا مدرستنا يا مدرستنا
أخلاق وعلم إحنا استفدنا
دى مدرستنا عنوان لبيتنا
وأحلى فرحة فى الدنيا جتنا

**

إدارة فن مفيش كلام
توجيه متابعة واهتمام
معلمات علم وكفاءة
أطفال ملايكة يعنى البراءة

**

مصر لينا هى الحياة

والعلم هو طوق النجاة

ومادام فى قلوبنا نبض

هنوصل يا مصر للسماء

**

إحنا جيل مش أى جيل

هنرد يا مصر الجميل

مهما تكون صعبة الظروف

هنبقى ليكى أهرام ونيل

هتقومى يا مصر

هتقومى يا مصر وهتعدى

بروح وعزيمة وتحدى

مجروحة بنزف يا ولادى

بس هعدى مين أدى

**

لو نسيتموا أصلى وزمانى

مش هضعف أنا هرجع تانى

أم الدنيا دا مكانى

وكرامتى هيَّ عنوانى

**

يلى إنت واقف فى طريقى

هيجى يوم وهتندم فيه

صعبان علىّ دا حقيقى

نقطه فى بحر هتعمل إيه

مفیش برکة

فین الضمیر راح فین

والقسوة إلی فینا منین

کل واحد إیده فی جیب غیره

مفیش برکه وهتیجی منین

**

لا الکیلو ألف جرام

ولا المتر ۱۰۰ سنتی

لا الغنی بینام

ولا الفقیر مرضی

**

لا الأستاذ بیعلم

ولا الطيب بيداوى

الأيادى بتسلم

والكل بقى حاوى

**

بنشقى ونضحى

والأكل مش صحى

مفیش خلاص برکه

ولا حاجه بتكفى

**

فى ناس كثير لسه

قلوبها فيها الخير

بغيرها ياناس حاسه

وعايشه عشان الغير

**

الخير هي فضل فينا

لو كنا حتى بعاد

يارب عافينا

دا لكل عُمر ميعاد

جانا رمضان

جانا رمضان أهو جانا

هينور لنا دنيانا

يا شهر الخير والهنا

الفرح زاد جوانا

**

جانا رمضان والناس

بيان فيها الإخلاص

الغنى ويًا الفقير

الله على دا إحساس

**

جانا رمضان كالعادة

شهر عمل وعباده

الأجر يبقى فيه

أضعاف أضعاف وزيادة

**

جانا رمضان والنور

فوانيسه زينته في الدور

أطفال وحتى كبار

الكل فيه مسرور

**

جانا رمضان واللمه

والدعوة هتبقى عامه

وموائد الرحمن

موجوده في كل مكان

**

مرحب يا رمضان

يا شهر القرآن

الكل في انتظارك

يا رحمة للإنسان

راجع بعد الأوان

وبعدنى عنها السفر

وبعدت عنها سنين

راجع وقلت القدر

هيجمعنا إحنا الإثنين

**

راجع والشوق سابقنى

بحلم أشوف عينيها

ويقول يا حب خدنى

دا قلبى ملهوف عليها

**

وصلت الشارع لقيت

زينه وناس بتغنى

وبسرعة دخلت البيت

حولها الناس بتهنى

**

وواحد ماسك إيديها

وأنا واقف مذهول

وعينه جات في عينيها

بقول دا مش معقول

**

سيبت المكان ومشيت

بقول يا قلبى مالك

من كتر الجراح بكيت

يا دنيا إيه جراك

**

إللى إشتريته أهو بعنى

وإللى دويته جرحنى

وإللى ضحيت عشانه

جه في الآخر سبنى

صلى على الرسول

صلى على الرسول

إلى يصلى ينول

يا بخت إلى يصلى

فى الجنة الوصول

**

صلى على نبينا

ياما وصى علينا

دى الصلاة عليه

حب ورحمه لنا

**

صلى على المختار

عمرك ما تحترار

صلى دائما صلى

فى الجنة أنهار

**

صلى على الأمين

يشفع يوم الدين

إلى ما بيصلى

يا خساره حزين

**

صلى على الحبيب

تلقى النفس تطيب

صلى وإوعى تكسل

والله دا عيب

**

دى الصلاه عليه

طاعه لأمر الله

تقربك إليه

وطوق النجاه

موعد مع الموت

صاحبي مسافر من زمن

في الغربة بيدفع التمن

سايب زوجته وعياله

كله شوق كله شجن

**

عياله قالو له وحشنا

مين يا بابا عنك حيشنا

وانت السند وانت الأمان

صعبة الحياه صعب الزمان

**

الأب قال يا ولاد ظروف

بعدي عنكم عليكم خوف

بكره خلاص أنا هرجع

قالوا إمتي ياريت نشوف

**

الأب عاش في الذكريات

قال حرام العمر فات

لحد إمتي في الغربة هفضل

دي الغربة ذل وتضحيات

**

كلم عياله وقال خلاص

سته الصبح إستنوني

أنا غصب عنى يا حبايبي

العيشه صعبه سامحونى

**

قبل الميعاد وصلوا المطار

زوجته وعياله فى الإنتظار

عدى الليل وجاى النهار

بس فجأة شافوا انفجار

**

زوجته آه بتتخنى

وعياله روحها بتسرق

فينك يا بابا إحنا عيالك

شافوا أبوهم بتحرق

**

حادثة وعملوها الإرهاب

قتلوا فيها أطفال وشباب

إيه الذنب ومين وصاكم

لا جات فى سنه ولا فى كتاب

كفايه ذنوب

كفايه ذنوب كفايه ذنوب

كفايه تقول على الناس عيوب

إمتى يا عبد بس تتوب

تستغفر ربك رب قلوب

**

إرفع إيدك قول يارب

وإنوى خلاص إن إنت تتوب

**

مهما طال العمر قصير

مهما كبرت فإنت صغير

تختار الخير تختار الشر

النهارده مُخير بكره مُسير

**

خايف عليك العمر يفوت

والدنيا مافيهاش خلود

وفى لحظه يا عبد يجيلك الموت

وساعتها ما بتنفع تعود

**

حاسب نفسك أول بأول

وإبعد عن أصحاب السوء

وقول للنفس خلاص هتحول

هتחס براحه والقلب يروق

نبذة عن الشاعر

الإسم : أحمد إبراهيم خليل

مواليد : مركز دكرنس محافظة الدقهلية

الإقامة : مدينة العبور محافظة القاهرة

المؤهل الدراسي : بكالوريوس تجارة

نشر عدة قصائد وأشعار متنوعة فى الجرائد اليومية والأسبوعية مثل أخبار اليوم والجمهورية والأهرام والمساء واليوم السابع والوفد وفيتو وبعض البوابات الإلكترونية.

